

Si menciona Edjean Semeleer, nos ta corda e hobencito cu e voz di oro infantil tanto aña pasa, cu a conquista curazon di henter nos pueblo. E hobencito cu a a pasa despues den e periodo di cambio di voz, tuma un periodo di sosiego, pa despues reaparece como Edjean Semeleer "aínda cu un voz di oro" pero un voz baronil.

Edjean semper a mantene su mes na top cu su canto, den tur sorto di festival, y a colabora y complace den tur sorto di actividad tambe.

E aña aki, el a pone su CD di Pasco "Hey.. ta Pasco!" riba mercado.

"Mi no kier pa bo skirbi bunita di e CD pasobra ta Edjean. Mi kier pa bo scuche na un manera critico, y si bo skirbi, skirbi critico tambe," el a bisa mi.

Ta manera mi ta haci cu tur CD of grabacion. Mi ta scucha nan tur na un manera critico, locual mi a haci cu esaki tambe y pasobra ta Edjean, lagami dune e critica di mas "negativo" cu mi tin riba e CD.

"Ta Navidad" ta e gaita cu el a habri cune. Un cancion cu areglo cu ta trecebo den ambiente di un "gaita tumba" y yena musicalmente cu instrumentonan di blaas, caminda bo por a imagina con Franklin Granadillo, cu su trompet, tabata goza e areglo di Hildward Croes.

E cuarta di Doodle Sophia claramente por a wordo scucha den su acompañamento unico estilo Doodle, y de vez encuando e sinfonia di man di Hildward cu tambe a acompaña riba teclado. Si e cancion aki no por trece un persona den ambiente di Pasco, ningun otro lo por anto, pasobra bo ta sinti'e.

Bunita tabata pa scucha Edwin Abath un biaha mas den



e ambiente navideño, y el a canta e gaita "El Caballito" di Ricardo Portillo, aregla pa Hildward.

Edwin a ponemi pensa riba e "muchanan di Playa Pabao" e hobennan di Estrellas del Barrio y e kibramento di akord di Doodle Sophia den e gaita aki cu su cuarta ta hibabo pa e periodo di e gaita tradicional, principalmente acompaña pa e tambornan di Miguel Genser y Joseline Thiel, y e teclado di Hildward cu zona meymey di esakinan. Aki ta Edwin "in his best" di gaita. E variacion a sigui cu e can-

"Hey, ta Pasco!" Berdaderamente "unico"



cion "mi Luz" di Everick Rincones canta pa Edjean Semeleer. Un wals lento, masha bunita den cual e guitarra di Pepe Gonzales combina cu e teclado di Johnny Scharbaay a yena masha bunita combina cu e programacion di otro instrumentonan musical den background formando zonido di un orquesta sinfonica.

E solo dushi di guitarra y e voznan di e coro a duna e cancion un toque special. Erin Croes tambe a sobre-



sali riba e CD aki. Despues di hopi tempo tabata masha bunita pa scucha Erin un biaha mas riba un grabacion. Masha bunita e ta presenta "Que Felicidad" aregla pa Hildward. Aki atrobe e programacion orquestal, combina cu e guitarra di pepe Gonzales a acompaña Erin cu a muestra un dominio masha bunita di voz bahando 3 pa 4 nota y subi atrobe pa tono halto, locual no ta facil pa keda cu tono puro. E coro tambe a zona masha bunita den e cancion aki.

Un gaita cu a ponebo pensa na prome instancia cu ta un bosa nova bo ta bay scucha, ta "Demuestra amor" canta pa Edjean Semeleer. Aki por a ripara mes ora cu gaita a dal aden cu Doodle mester tabata tin su toque den dje, y ta resulta tambe un composicion di Doodle Sophia. Un gaita lento cu un coro cu toque Estrellas del

Barrio.

E palabranan tambe ta masha bunita cu entre otro "demuestra amor, tambe lo bo ricibi amor. Biba bon cu nos ruman Pasco ta tempo di paz lago nos ban stima otro. Cu cariño y bondad pa demosta cu Aruba por".

Otro variacion bunita riba e CD a bini di e compositor Roy Olive.

Edjean Semeleer a canta su bolero "Un ruego" cu areglo di Johnny Scharbaay.

Masha precioso tabata e guitarra di Pepe y e piki di violinan cu toque mexicano, estilo bolero-ranchera y cu programacion orquestal sublime di Johnny.



Un gaita cu mi a gusta masha hopi tambe ta esun canta pa Jeaneidy Semeleer, ruman di Edjean. Un di e motibonan ta e estilo di principio di añanan 60 cu gruponan di aguinaldo tabata canta nan gaita tambe y e coro Tutti Frutti cu a acompaña Jeaneidy a trece e toque ey back. Man di Maybelline Arends Croes naturalmente tabata den esaki tambe.

Tur fanatico di aguinaldo y gaita di e periodo 60 pa 70 sigur lo bay back den pensamiento scuchando e gaita aki.

Precioso tabata tambe e teclado combina cu e programacion musical, y e sinfonia di man di Hildward y e percusion, combinando estilo di ayera cu estilo di awe y cu quebradanan fantástico.

Recuerdo ta bin dilanti un biaha mas ora cu "Llanto di un mama" cuminsa toca den su forma original. E pensamiento ta bay riba Ludwina Booi, pero den e caso aki, e version moderno orquesta aki ta canta den voz di Magdaline Roos cu



un voz sensual precioso. Esaki ta cancion cu melodia di Maybelline Arends Croes

y letra di Hubert Booi. E cancion aki semper lo keda un clasico di temporada di Pasco y atrobe ta trece "grandinan" bek pa e periodo di estilo di aguinaldo principalmente e acompañamento di e coro Melange bao direccion di Maybelline.

Un preciosidad ta e cancion "Bo no ta bo so", composicion di Edmond "Juni" De Freitas.

Riba e CD e ta ser canta pa Edjean Semeleer, aregla pa Johnny Scharbaay. Bo lo por hura cu Juni a compone e cancion special pa e voz di Edjean pasobra mas bunita y cu mas emocion no por trece mihor. E palabranan tambe ta precioso, combina cu e tononan di guitarra di Pepe Gonzales, mencionando entre otro: "Mi kier pa bo sa mi ruman, cu bo no tin nodi yora mas. Mi kier pa bo sa di berdad, cu bo no ta bo so. Pasobra hopi añanan atras, un promesa a wordo proclama cu riba e anochi di paz den un pesebre humilde ta nace e Rey di bondad y su luz lo briya pa bo tambe, apesar

cu bo ta den scuridad." No yora mas, sali pafo, halza bo mannan y alavez lanta bo cara, yame na su number. Semper e ta acompaña Si acaso bo a faye pidie pordon di berdad."

Combina cu e tononan sublimes di guitarra di Pepe, e coro Melange, y programacion musical precioso, e cancion aki ta un di esnan mas bunita di e CD.

Finalmente e CD ta termina cu "Dande" cu un toque cu quebrada moderno, cu no ta mishi cu nada di e ritmo di Dande.

Cual critica "positivo" mi por tin?

Esaki ta pa esnan cu cumpra e CD aki, cuida e CD bon despues di dianan di fiesta, y cera e CD den un kashi cu bon yabi, pa cada aña disfruta mas y mas di dje den temporada di Pasco, pasobra e ta "unico" di berdad.

Jubv Naar.

Diadomingo
BARANCA
DI YERBA
O.R.E.O. NBO MAC-10
SURPRISE BAND
4-12 **MIKE'S DISCO**
Entrada Afl. 10.00



L.G. Smith Boulevard # 152
P.O. Box 468, Oranjestad, ARUBA
Tel: (297-58) 25545 / 25546
Fax: (297-58) 25549

Tin mester di:

Un
SHELFPAKKER

Trece cu bo un C.V.,
pasfoto y jena un
aplication form na
Costumer Service.